

醒世千家詩（孝篇）

作者：未知

遊子吟

唐孟郊

慈母手中線，遊子身上衣。
臨行密密縫，意恐遲遲歸。
誰言寸草心，報得三春暉。

題暉草齋

清劉獻廷

誰將堂上春，得比春日暉。
日入光更出，親老無重歸。
誰將人子心，得比庭前草。
春風日日吹，草色年年好。

題愛日堂

明方孝孺

白日麗青天，朝出扶桑暮虞淵。
堂上衰親雪滿顛，坐看白日心茫然。
長繩不可系，急景如流川。
羲和羲和停汝鞭，高堂一日如千年。
(羲和者，禦日之神)

憶 母

明史可法

母在江之南，兒在淮之北。
相逢在夢中，牽衣喜且泣。

燕子磯口占

明史可法

來家不面母，咫尺猶千里。
磯頭灑清淚，滴滴沉江底。

元日哭先大人

清周淑然

一夜思親淚，天明又複收。
恐傷慈母意，暗向枕邊流。

山中夢母

明劉宗遠

霜月照屋壁，霜風湧江波。
終夕不能寐，輾轉思懷多。
忽夢吾母來，宛然度山阿。
但問兒衣薄，語短不及他。
兒寒尚可忍，地下知如何！

慈烏夜啼

唐白居易

慈烏失其母，哇哇吐哀音。
晝夜不飛去，經年守故林。
夜夜夜半啼，聞者為沾襟。
聲中如告訴，未盡反哺心。
百鳥豈無母，汝獨哀怨深。
應是母慈重，使汝悲不任。

昔有吳起者，母歿喪不臨。
嗟哉斯徒輩，其心不如禽。
慈鳥復慈鳥，鳥中之曾參。

燕詩示劉叟

唐白居易

梁上有雙燕，翩翩雄與雌。
銜泥兩椽間，一巢生四兒。
四兒日夜長，索食聲孜孜。
青蟲不易捕，黃口無飽期。
嘴爪雖欲敝，心力不知疲。
須臾千往來，猶恐巢中饑。
辛勤三十日，母瘦雛漸肥。
喃喃教言語，一一刷毛衣。
一旦羽翼成，引上庭樹枝。
舉翅不回顧，隨風四散飛。
雄雌空中鳴，聲盡呼不歸。
卻入空巢裡，啁啾終夜悲。
燕燕爾勿悲，爾當返自思。

思爾為雛日，高飛背母時。
當時父母念，今日爾應知。

出 門

清高其倬

飛鳥翔遙林，銜哺戀故枝，
人生重別離，況是親衰時。
升堂告行役，暗淚腸中垂，
未言向何處，先說還家期。
慈親起送我，語好顏色淒。
愛我不願哭，願我平安歸，
家貧萬事乏，供饋倚病妻。
嫁衣典已盡，不復餘襜幃，
男兒羞低顏，舍子將語誰。
在家同一愁，出門成兩悲，
傷心最何物，兩輪八馬蹄。
今日行門前，明日行天涯，
寒水嗚咽流，木葉高下飛。
天晴尚愁人，風雨秋淒淒。

憶 母

清沈受宏

貧是儒家事，難安為老親。
遙憐負米客，長作倚閭人。
夜績孤燈暗，朝梳白髮新。
生男亦何益，只是累艱辛。

歸 來

清王鴻緒

吾母倚閭久，風塵望早歸。
驚看遊子面，為浣去時衣。
岩筍經冬出，慈鳥向晚飛。
白華堪志養，不必羨甘肥。

秋日憶家大人粵游

清陸寅

又見秋風動，蘆花江渚飛，
忍看時序變，猶與老親違，

遠信無他語，深情只望歸，
應憐揮手日，兒女共牽衣。

憶 父

清寧凌雲(女)

吳樹燕雲斷尺書，迢迢兩地恨何如，
夢魂不憚長安遠，幾度乘風問起居。

憶 母

清倪瑞璿(女)

河廣難航莫我過，未知安否近如何。
暗中時滴思親淚，只恐思兒淚更多。

題乞丐承歡圖

清 蓉湖愚者

乞兒底事到今稱，為解親前色笑承。
多少翩翩裘馬客，庭幃岑寂冷如冰。

拜掃詩

清王之鐵

一年始得見兒孫，正好團樂骨肉恩。
豈意到來來即去，空留細雨灑黃昏。

清明行

宋胡時中

憶昔父母康健時，清明攜我上邱壟。
如今清明我獨來，卻挈小兒拜先塚。
搔首東風淚滿衣，江山雖是昔人非。
兒曹問我悲何事，此意他年汝自知。

寄子詩

宋人(洪浩之父)

太學何蕃久不歸，十年甘旨誤庭幃。
休辭客路三千遠，須念人生七十稀。
腰下雖無蘇子印，篋中尚有老萊衣。
歸期定約春前後，免使高堂式微。

寄子詩

宋人（章嘉之父）

九十衰翁七十兒，此時哪可兩分離。
客鄉已是三年別，人世應無百歲期。
春雁北飛頻送目，夕陽西下幾顰眉。
何如及早成歸計，莫待山榴開滿枝。

寄子詩

明吳敬夫

劍閣凌雲鳥道邊，路難聞說上青天。
山川萬裡身如寄，鴻雁三秋信不傳。
落葉打窗風似雨，孤燈背壁夜如年。
老懷一掬鍾情淚，幾度沾衣獨泫然。

望月思親

明沈周

韋郎五歲失其母，恃有父存未知苦。
長來見父不見母，欲入地來地無戶。
仰對青天見缺月，嗟吾獨見一慈父。

明朝又是月圓時，死者安能復如此。
常常見月便斷腸，天或哀憐為風雨。

宿彭水縣感懷

宋陸遊

木欲靜兮風不止，子欲養兮親不留。
夜誦此語涕莫收，吾親之沒今幾秋。
尚疑舍我而遠遊，心冀乘雲返故邱。
再拜奉觴陳膳羞，陶盎治米聲漉漉。
木甌吹餅香浮浮，毛姜屑桂調甘柔。
佐食佳餚百計求，夜敷枕席視衾裯。
晨起薰籠進衣裘，哀哉此志終莫酬。
有言不聞九泉幽，北風歲晚號松楸。
哀哉萬裡為食謀！

割肝行

（莆田車孝子割肝愈母病，十五年後再割，母不肯嘗，遂卒。）

清潘耒

世間至孝稱割股，車朗割肝心更苦。
一割已足通神明，再割彌令人天驚。
兒身母身同一體，平時髮膚不敢毀。
親危力竭無奈何，一線可延不惜死。
精誠感天天可回，十五齡延糜一杯。
糜一杯 能再進，母不嘗 兒心盡。
紛紜萬口爭誇矜，兒心豈願求名稱。
亦或引古相繩詆，兒迫遑知律與禮。
若使一念生較量，寸誠何足動蒼穹。
貧能養親不離膝，少壯至老如一日。
史家論人須核實，縱不割肝猶可述。